

四庫全書

史部

欽定四庫全書

聖祖仁皇帝親征平定朔漠方略卷七

七月庚寅朔

命科爾沁土謝圖親王沙津候諸路軍至齊發沙津  
遣署副都統蘇爾米二等護衛根都等往偵噶  
爾丹至察克墩登高望之見噶爾丹前哨次第  
屯列且望見其營壘甚近沙津即率所備兵前  
進具奏以

聞

上諭曰大兵陸續前進朕亦親往姑勿與戰以待各路軍至齊發毋致失利其檄王沙津知之

辛卯

命和碩裕親王福全為撫遠大將軍和碩恭親王常寧為安北大將軍時噶爾丹深入烏朱穆秦地上命和碩裕親王福全為撫遠大將軍授以印皇長子胤禔副之出古北口和碩恭親王常寧為安北大

將軍授以印和碩簡親王雅布多羅信郡王鄂札  
副之出喜峯口內大臣國舅佟國綱佟國維內大  
臣索額圖明珠阿密達都統蘇努拉克達彭冲阿  
錫坦諾邁護軍統領苗齊納楊代前鋒統領班達  
爾沙邁圖俱叅贊軍務諸軍前發惟佟國維索額  
圖明珠留京俟大將軍將至陰山馳往會之

頒發軍令

上諭兵部曰本朝自

列聖以來戰必勝攻必克所向無敵者皆以賞罰明法制  
嚴兵卒精銳器械堅利人思報國殫心奮勇之所  
致也今軍行其令各該都統以下察核軍實凡甲  
冑弓矢諸器械務令犀利堅好其盔甲俱繫號帶  
馬駿尾書旗分佐領姓名其行也視大纛整隊齊  
發有零星前後錯行及醉酒者該管官立拿懲責  
其止也各按旗分隊伍分列屯扎有前後錯亂者  
罪及該管大臣馬無印箭無名各罰以銀給拿獲

者竊取鞍轡什物馬匹者視其多寡治罪失火者亦從重究懲官兵廝役所過百姓蒙古地方毋騷擾毋搶掠毋踐踏有擅離營伍入村落山谷奪人財物者軍法從事罪及本主及該管官軍士廝役逃亡在喀倫內立行察拿治罪如出喀倫外該管大臣即遣官兵窮追務獲立斬以徇如不能獲則將往追將卒從重治罪其逃人之主及該管官一并嚴行察懲既出我境哨探斥堠務期嚴密如曠

野交兵對陣見敵王貝勒貝子公大臣不按次序  
攙越前進及見賊兵寡弱不復請令冒昧前進者  
有功不叙仍治以罪其進也須齊列緩轡按隊前  
行如自離其隊而附人後或自棄其伍而入別行  
或他人已入而獨留不進身死家沒及重責革罰  
分別治罪如整齊而進擊敗賊兵厥功維均勿以  
畧分先後致生爭競至彼不抗我軍而奔潰則選  
精兵良馬逐之列隊躡踪而進如前忽遇伏或賊

兵有旁抄者則後隊接戰夫兵者所以討逆而安順也領軍大臣果能嚴束其下不使良民受害朕不靳厚賞否則罰亦無赦凱旋之日有以兵器私售蒙古者本人治罪并及該管官馬乃大軍急需須視水草善地小心護養起行時則留將卒察收遺失之馬視駿尾所繫字樣交還原主如係疲馬則開明馬色數目交所在官司人民蒙古善行牧養報知兵部如有匿而騎用及殺之棄之者治以



罪其遺馬疲馬之人亦開明馬色報兵部存案恐  
官兵未能遍知爾部其刊布曉諭之

臣  
謹按我

國家兵制至善軍法至嚴亘古所不及

皇上智勇天錫以守成兼開創嗣位以來平三藩收海  
孽定察哈爾之亂

天戈所指捷如雷霆蠢茲噶爾丹無知逆命

皇上震電憑怒乃遣將出師申嚴教誡才百餘言耳而

坐作進止之方奇正勦禦之法莫不燭照數  
計纖悉靡遺不待秉鉞擁旄而早已決勝萬  
里之外矣抑又聞之兵者聖人不得已而用  
之以除暴安民而已故曰桓文之節制不如  
湯武之仁義仁義者所由制勝無敵之資也  
今誕告有衆所諄諄往復者惟以禁侵掠安  
良善為至計故師行所至民不知兵市不改  
廛野無失業其真所謂聰明睿智神武而不

殺者與

命發大同綠旗官兵兵部奏言大將軍裕親王等奏  
殺虎口密邇歸化城請撥大同綠旗兵前赴以  
聽調遣應如王等所請於大同鎮標選馬兵六  
百步兵內或藤牌或火器一千四百令將領率  
之於七月初十日内至殺虎口其總兵官王壁  
尚未受事或徑赴大軍或仍留大同應候

旨行

上曰此所撥兵係鮑敬舊轄即令率之前往聽調王璧蒞任後仍留防守地方

命隨大軍設站

上諭理藩院曰大將軍裕親王率大兵出古北口其令侍郎薩木哈學士布顏圖自阿爾尼設站分路之處酌撥附近旗分人馬尾隨大軍設立驛站

壬辰

命內大臣阿密達軍暫駐岡阿副都統噶爾馬率兵

往會阿爾尼等六月二十七日至阿霸垓聞前  
軍已與噶爾丹交鋒乃遣人探兩尚書所在往  
會之以兵力單弱便宜於附近調察哈爾左翼  
四旗兵每旗百名以行越二日與阿密達軍會  
於岡阿具疏以

聞得

旨前已調發察哈爾兵八百左翼兵無庸再調今撫  
遠大將軍將出塞應令阿密達等暫駐岡阿偵明

蘇努軍行實信與之齊赴克勒以候大將軍至如  
聞厄魯特內向即回與大軍合其檄知之

命奏報軍情許大將軍等閱視大將軍裕親王等奏

言<sub>臣</sub>等既身率重兵其切近噶爾丹處奏報機

宜似宜備文令<sub>臣</sub>等知之

上曰軍機於爾等豈有所秘哉但另文則未免煩複且  
恐遲延自後奏報軍機皆令馳赴軍前爾等接視  
封進有所見即附奏以

聞

諭尚書阿爾尼等遣人迎都統額黑訥軍

上諭理藩院曰額黑訥軍從某邊汛達阿爾尼所較為捷近其諭阿爾尼等遣能員速往迎之兵力薄恐突遇敵兵也阿爾尼所駐地如有可虞漸移入內謹防斥堠又聞喀爾喀行劫驛馬其曉諭嚴禁之  
癸巳

命侍衛阿南達等往會尚書阿爾尼等軍阿南達等

奏言

臣

等六月初十日自伊黑噶扎爾起行至

布喇漢布喇克尚書阿爾尼檄令

臣

等率察哈

爾兵并礮至他奔他什海

臣

因選兵五百前赴

至岡阿則阿爾尼等已回就大軍

臣

乃疾行至

阿霸垓聞阿爾尼在西喇西巴爾臺集兵噶爾

丹已東走矣

臣

等道遠馬疲以羊為糧羊亦瘠

乏僅以歸化城副都統阿玉璽所運來米一百

石散給士卒尚餘米百駝阿玉璽護之與

臣

等



同行迎就大軍奏至

上曰阿南達等與阿爾尼噶爾馬兩軍就其近者往會之額黑訥兵恐亦糧盡勢迫其檄阿南達速往迎之入邊副都統阿玉璽所解米百駝量給阿南達兵餘留以給額黑訥軍令阿南達酌行

命大將軍恭親王常寧率兵往會大軍恭親王奏言

臣既出喜峯口當由何道而進

上曰視其道之近者往與大軍會其出古北口之兵糧

儲多爾等未會之際糧宜節省出邊後有助糗糧者聽助籍其姓名以聞所助牛羊俱收畜及時以散給之炎暑軍行恐人馬勞苦其令晝止夜行遣使往檄噶爾丹

上諭理藩院曰前使諭噶爾丹者音耗久絕爾衙門其遣筆帖式一人撥什庫一人乘驛往偵之乃奏請改撥什庫巴扎爾為筆帖式往檄噶爾丹檄曰前者差本院員外郎阿爾必特祜達賴等使汝

嗣又差郎中滿丕員外鄂齊爾等使汝至今未  
歸是以又遣筆帖式巴扎爾前來如前使未經  
遣回其速遣之

乙未大將軍裕親王福全帥師啟行裕親王將  
行

上御太和門大學士伊桑阿捧

勅大學士阿蘭泰捧印授王

勅曰喀爾喀厄魯特原屬同修職貢之國因伊等交

惡構兵朕不忍民生塗炭曾遣使與達賴喇嘛使  
人偕往厄魯特諭令仍尋舊好乃厄魯特噶爾丹  
陽順陰違反侵擾我屬部掠奪烏朱穆秦四佐領  
茲因遣發大兵聲罪致討特命爾和碩裕親王福  
全為撫遠大將軍皇長子胤禔為副與內大臣國  
舅佟國維內大臣索額圖明珠阿密達公蘇努都  
統國舅佟國綱公彭冲都統諾邁護軍統領楊代  
前鋒統領邁圖等統領官兵前往征討行間諸事

爾與皇長子及諸大臣等籌畫善策協議舉行勿  
謂自知而不納衆論勿當事會而致失機宜勿恃  
兵強而輕視逆寇嚴偵遠探罔或疎虞其統領蒙  
古兵丁前來王貝勒扎薩克台吉等亦與共相商  
確酌量而行所調盛京烏喇官兵到時爾一併統  
率調遣有能擒斬噶爾丹來歸者分別陞賞爾須  
約束將士申嚴紀律凡經過地方毋得騷擾百姓  
歸順良民加意撫綏務體朕定亂懷遠至意其行

間將領功績及重罪俱察實紀名彙奏各官有犯  
小過者當即處分至於驍騎校護軍校以下無論  
大小罪過俱商酌徑行處治務將厄魯特殲勦廓  
清安靜邊圉斯稱委任爾等宜殫竭心力蚤奏膚  
功欽哉王跪受畢

上出東直門

視諸王起行

丙申

命內大臣阿密達等軍候大軍於克勒阿密達等奏  
言噶爾馬等所遣使偵阿爾尼軍者七月初二  
日還報言阿爾尼吉爾他布與翁牛特杜稜王  
巴林阿拉卜灘俱率兵駐葫蘆谷爾河噶爾丹  
離舊戰地五日程至厄勒冷矣臣等因與扎錫  
王共率兵於次日起行赴阿爾尼所奏至

上諭曰阿密達等既與阿爾尼等會仍當偵明蘇努軍  
行所至率兵與阿爾尼阿南達巴林翁牛特等軍

齊至克勒候裕親王大軍

命阿霸垓等旗嚴備喀爾喀并供應往來驛站糗糧  
上諭內大臣國舅佟國維等曰京城大軍絡繹出邊阿  
霸垓阿霸哈納爾蘇尼特嵩齊忒等兵無所調用  
令不必赴尚書阿爾尼軍前著於各旗形勝之地  
駐扎嚴防喀爾喀新來之衆妄行並供應往來差  
遣人員驛站糗糧毋悞

命內大臣蘇爾達約大軍齊發罷大將軍恭親王常



寧兵蘇爾達奏言

臣

於六月三十日至科爾沁

見達爾漢親王班第距其舊居六日程駐圖思  
噶爾圖山兵到者僅半喀喇沁阿霸垓柰曼兩  
土默特兵亦未到

臣

俱移文及檄

盛京兵促其前來俟到日整飭軍伍進發奏至

命議政王貝勒大臣集議其恭親王兵應否停止一

并議奏議曰蘇爾達去時

勅諭甚悉其恭親王兵且勿出但令預備前已檄王

沙津等姑勿與厄魯特戰以俟大兵今蘇爾達等亦應俟諸軍齊集遣人約大將軍兵協力以進

上曰恭親王兵可勿備餘如所議其令裕親王及叅贊大臣等知之

戊戌

命內大臣索額圖統兵前進相機撲剿

上諭內大臣國舅佟國維等曰朕夜來思及一事方欲

傳諭適諾木齊岱來奏蘇爾達之語與朕意相符  
朕觀噶爾丹退回二宿之地似欲潛逃如俟京城  
大兵至始追之恐不及聞盛京烏喇兵俱已起行  
十日內即到矣其令阿密達全軍及公蘇努軍中  
視有壯馬者選出即簡出征大臣一員統領而往  
沿途擇水草善地剋期到彼如噶爾丹欲逃即行  
追剿無失機會若彼來迎敵則我軍切勿急行以  
待大兵姑遣使往諭之曰汝闌入我邊汎尚書阿

爾尼等不得不迎戰汝向與天朝修貢通好此來  
追喀爾喀耳今喀爾喀劫奪我外藩肆行悖亂亦  
與我朝相失聖上特遣和碩裕親王及皇長子來  
與汝申明禮法自茲以往永定盟好汝不聞前者  
我朝出兵至俄羅斯以禮和好不戰而歸乎汝其  
謹俟王及皇長子之至如此往復遣使以羈留之  
大兵可俟阿爾尼等所有扎薩克兵及阿南達兵  
其馬既不堪用著阿南達親押火器速往與盛京

烏喇科爾沁兵會阿南達等所留之兵著一人管轄駐於現居之地不時探報蘇努等所餘之兵尾此軍後聯絡坐臺哨探其令議政王貝勒大臣集議議曰

上諭已極周詳其統領此軍之大臣及管轄阿南達所留兵之人員恭候

特簡

上曰著索額圖統領偕阿密達先往令阿密達及蘇爾

達叅酌而行索額圖阿密達前去則攜前鋒叅領  
石圖與俱併量選前鋒兵帶往至則視其情形如  
彼能待則俟大兵而行不能待則遣人羈縻之必  
不得則明諭之曰聖上遣皇兄皇子與汝相見非  
惡意也汝乃不俟而去非汝之不軌乎雖聖上戒  
勿戰我不汝貸也往復數四度盛京烏喇諸部落  
兵且至力足以勝即便宜行事如彼奔逃已遠不  
便往追則速奏以便撤兵蘇努及阿密達之軍俱

令蘇努率之而往除阿南達等押礮及馬壯者前去外其馬不堪者酌留令副都統扎木素噶爾馬領之駐阿爾尼等原駐之地探噶爾丹聲息及額黑訥軍情不時報聞并防禦就近地方作惡肆行之人其扎努喀朱爾蘇亦酌量帶往調用索額圖取皇長子廐馬百匹乘以前去

命隨大軍運糧時大軍已起行理藩院奏言軍行餉不可緩請遣戶部司官一員及看守米石

臣部

員外郎蒙古兒以駝一千二百五十頭運米一千五百石往克勒侯大軍至通行散給後令喀喇沁多羅郡王扎錫仍照數撥給官兵押駝隨臣部及戶部司官同赴坡賴村再運往迎大軍奏入

上曰大軍已賚兩月糧又有一千五百石隨行吳巴什又運一千餘駝而往若此米至克勒即行給發則軍行未久恐難攜帶反至糜費其令賚運者隨撫



遠大將軍後不拘何地當給方給之俟畢令吳巴  
什蒙古兒等仍率察喀爾喀喇沁官兵驅回坡賴  
村將運到之米馱載前赴大軍其坡賴村米令戶  
部司官同霸昌道監發

辛丑內大臣索額圖請趣

盛京烏喇等兵速赴軍前索額圖奏言

臣近閱阿

爾尼疏言噶爾丹今在烏朱穆秦旗分奇爾薩  
布喇克之地如遵前

旨赴蘇爾達所則似迂曲臣已選蘇努軍中馬壯者

往與阿密達軍會伏乞

勅諭趣盛京烏喇兵科爾沁等旗兵速赴臣軍

上從之

壬寅

勅諭噶爾丹時噶爾丹遣其使達爾漢格隆奏言喀爾喀吾讐也因追彼闌入邊汎向在

中華皇帝道法之中不敢妄行

上因賜來使筵宴賞賚令賚

勅歸諭之

勅曰據爾使人達爾漢格隆陳奏具見敬順悃誠朕  
統御天下重信義而賤欺誑前以七旗喀爾喀彼  
此構怨與達賴喇嘛共議遣大臣諭和不意左翼  
興兵妄動朕弗之直也後喀爾喀為爾所敗匍匐  
來歸朕念普濟衆生之意賜以米糧牲畜所全活  
者無算喀爾喀何利於朕而施恩若是皆朕不忍

生民之顛沛故耳是年出盟方分別七旗曲直昭  
雪扎薩克圖汗之事欲仍前設立右翼議未及定  
爾兵已至乘虛驟入褫守汛者衣服出言不遜朕  
亦不深責六月二十五日遣員外郎阿爾必特祐  
等問故而阿爾尼等在邊以爾公然闌入邊汛守  
邊責重不能容忍遽與爾戰朕甚非之六月二十  
九日復遣郎中滿丕賚勅諭爾及商南多爾濟歸  
取行糧而已豈有正事尚未議定即可言執土謝

圖汗折卜尊丹巴以畀汝乎此皆使臣設計脫身而為此言也汝謂與達賴喇嘛道法為一則當憐念衆生同心以安喀爾喀令七旗同享安樂以仰副朕意乃反肆殺戮拆人妻子離人骨肉浸淫邊地掠及四佐領之人揆之道法可若是行乎恐達賴喇嘛未必使汝為此也西寧報至聞策旺拉卜灘以汝罪告之達賴喇嘛將興兵伐汝夫興戎非美事也朕且將與達賴喇嘛共議調和而聞汝已

駐兵烏爾會河故朕遣和碩裕親王皇長子及大臣量發滿兵而往非討汝也欲定議耳本朝前者遣大臣往俄羅斯議事亦發兵往議畢而回汝所夙知也為汝計其聽達賴喇嘛言罷兵息戰各享安樂既合衆心亦易畢事如仍以前事為辭妄行劫掠則隳敗名教自汝始矣又

諭理藩院曰索額圖等行與蘇爾達會爾衙門即遣司官一員偕噶爾丹使人達爾漢格隆等從喜峯

口至索額圖等軍前如索額圖等以使人為可遣  
歸則遣之如不可則留之

命諸路兵齊集巴林大將軍裕親王等奏言厄魯特  
今至奇爾薩布喇克之地於

盛京烏喇科爾沁調兵之處不相涉蓋稍在內矣  
索額圖等若仍赴蘇爾達所似覺迂曲然已近  
巴林臣等欲使索額圖等勿赴科爾沁而駐軍  
巴林以待臣等當選馬疾行尾隨索額圖而

進尚書阿爾尼等奏言噶爾丹距臣軍所駐西喇西巴爾臺僅一日程又侍衛阿南達率察喀爾兵五百及運米土默特兵二百已至臣所并巴林翁牛特兵八百共一千五百名臣等率之已與內大臣阿密達軍會兩軍止三千餘耳勢力單薄請且駐朱爾亨布喇克等處整兵以待禁軍奏入

上諭曰速檄索額圖至巴林候裕親王王等亦不必選



馬疾行率全軍赴巴林并令人追蘇努兵之分行者齊赴巴林其阿密達阿爾尼等兵速令內向至我大軍去路以待又前所發五旗每佐領護軍二名令恭親王領之踰二日起行王其約束軍士所過毋踐禾稼

癸卯

車駕發京師

上諭都統瓦代等曰據關保奏噶爾丹於六月二十七

日遣發其使人及我撥什庫次日潛師退去班第  
蘇爾達等遣人躡視之噶爾丹兵果已北去朕之  
欲幸此軍者以躬近行間便指示也今噶爾丹雖  
退而喀爾喀方且橫行劫掠驛遞及諸扎薩克馬  
畜衣服乘此大兵集會朕乃親往視師以靖喀爾  
喀之肆俾知所畏忌事可一舉而定也是日

上詣

皇太后宮請

安遂啟行

甲辰

命暫赦員外郎阿爾必特祜等罪令隨軍効力時學士西拉奏員外郎阿爾必特祜達賴奉

使噶爾丹歸言我等至科爾沁王沙津所沙津云我已遣二百人往視噶爾丹所在我等隨取鄉導馬匹追躡之行二日遇諸塗問之據云噶爾丹已退去矣又向北行三宿視之漫不見踪跡我已

等思所攜糗糧且盡道途多劫既不獲見噶爾丹徒毀及

勅書賜幣無益是以歸來

臣

思阿爾必特祜達賴皆

係重囚

皇上宥其死罪復其原職而遣之不思効力酬

恩不終使事擅自來歸不誅無以示後應立正軍法上可其奏隨又

諭大學士伊桑阿曰阿爾必特祜達賴罪本應誅今

暫免其死與巴扎爾俱帶之前去出口後或有差遣之處亦未可定若能効力則貸其罪否則殺之前遣筆帖式巴扎爾亦未見噶爾丹而歸故

上諭並及之

命以太僕寺馬一千五百匹給大將軍裕親王軍

丙午

命內大臣蘇爾達等軍赴巴林以會大軍蘇爾達等

奏言

臣等所領兵至烏爾會河者祇三千三百

有餘及土默特兵二百八十其教漢等四旗兵  
及

盛京兵俱未到而阿爾尼等報稱噶爾丹七月初

七日至奇爾薩布喇克其地近於陰山

臣

等所

駐反過之恐厄魯特由陰山乘虛而進

臣

乃移

駐阿魯昆都倫以待後軍奏至

上諭曰諸台吉軍中馬瘦糧少者著留於阿魯昆都倫  
之地擇善約束之台吉統領駐防其已到之土默

特兵令蘇爾達沙津班第等率之俟盛京烏喇兵到全赴巴林以會大軍其赦漢等四旗兵之未到者速遣諭之不必赴科爾沁亦往巴林并檄撫遠大將軍及叅贊大臣知之如有所見具奏以聞

丁未

命內大臣阿密達尚書阿爾尼等會內大臣索額圖軍索額圖奏言十一日臣遣察哈爾佐領鄂爾哲喀喇沁佐領恩克等往偵十四日歸報知厄

魯特兵駐扎和爾洪河上流距我軍所駐濟爾  
河有二日程臣等即於十五日起行赴巴林奏  
至

上諭曰頃者令裕親王等領全軍赴巴林索額圖在巴  
林候大軍已有諭旨其檄諭阿密達阿爾尼等速  
來會

命康親王傑淑等率兵往會大將軍裕親王福全軍  
裕親王等奏言臣等偵得噶爾丹於是月十一



日在音扎哈河上流十二日至和爾洪河十三  
日沿河而下幾百里往岳洛岩視其所向將往  
達爾腦兒之地距岳洛岩約六日程臣等尾追  
不及今沿拜察河徑由正藍旗遊牧之地往禦  
之遣人乘驛令我牧地蒙古及土謝圖汗折卜  
尊丹巴庫圖克圖各驅牲畜入近邊遊牧且速  
檄知康親王奏至

命議政大臣集議議曰蘇努阿密達軍應令會集速

行檄康親王等駐形勝之地探聽亦檄蘇爾達等知之至牧地蒙古若俱令內徙恐誤驛遞宜諭止之仍令於舊地遊牧議入得

旨康親王速率兵會大將軍檄知蘇爾達等餘如所議

內大臣阿密達奏遣郎中哈爾吉布等使於噶爾丹阿密達奏言是月十五日濟隆庫圖克圖之拉木扎木巴同伊拉古克三庫圖克圖之尼

隆格隆等來至臣所告曰噶爾丹言我自入邊  
秋毫無犯

皇帝亦惠我幣帛

勅書甚大德也今乃聞侍衛阿南達率兵及諸路軍  
雲集又聞有內大臣且至土謝圖汗之子噶爾  
旦台吉亦在軍中夫執鼠之尾尚噬其手今雖  
臨以十萬衆亦何懼之有臣等答之曰奉

命防邊

上意勿與厄魯特戰也我寧敢違

旨乎阿南達等久已赴京噶爾旦台吉不知所往拉  
木扎木巴又曰噶爾丹博碩克圖汗言兩庫圖  
克圖及商南多爾濟來事已定議將於次日遣  
奏而是夜兩尚書來襲我入我兄子營殺及子  
女不戰者如是乎臣等答之曰彼闌入邊汎掠  
我烏朱穆秦兩尚書不得已與之戰今

聖上特遣皇兄皇子來與噶爾丹定議我等亦將內徙

矣

臣

因遣郎中哈爾吉卜少卿巴圖與其使人

偕行

臣

又聞其從者曰十五日噶爾丹引兵內

進屯於西喇西巴爾臺矣奏至

上命示議政大臣

戊申

命恭親王常寧率師會大將軍裕親王福全軍

上諭兵部曰恭親王令統兵自鞍匠屯取道興州趨正

藍旗遊牧之地往會大將軍裕親王軍

諭康親王傑淑等仍駐軍歸化城

上諭兵部曰康親王兵不必前來仍令回駐歸化城至  
調四子部落三吳喇忒毛明安喀爾喀達爾漢親  
王六鄂爾多斯歸化城之兵應否留於康親王處  
議政大臣等集議議曰歸化城永宜留兵防守應  
遣人迎康親王回其外藩兵應調其半至康親  
王所歸化城兵亦檄知少詹厄爾賽令其預備  
又前所撥宣府鎮標兵一千并藤牌手一百候

調遣者令許盛率之大同兵二千備殺虎口者  
令鮑敬率之俱速赴歸化城康親王軍前

上從之

己酉

命簡親王雅布赴大將軍裕親王福全軍時簡親王  
隨

駕至青城請往軍前効力

上令簡親王趨赴裕親王軍前叅贊軍務

內大臣阿密達奏報噶爾丹及濟隆庫圖克圖  
使人至軍前阿密達奏言臣等率兵將赴巴林  
即遣人偵探噶爾丹聞已至和爾洪欲往巴林  
恐反在其後故臣等駐軍木西峽及噶爾達蘇  
台兩河界已檄知蘇努軍後聞噶爾丹又前進  
至和爾圖臣前所遣郎中哈爾吉卜等歸告臣  
等曰我等至和爾圖噶爾丹所屯也語拉木扎  
木巴等曰爾其以我來之故聞之兩庫圖克圖



且使我等一見噶爾丹乎頃之拉木札木巴等  
來告曰汝言皆轉達庫圖克圖矣濟隆庫圖克  
圖言此來甚善

皇帝與博碩克圖汗通好乃大幸也博碩克圖汗並無  
所言汝等少坐即與相見語畢而去待之良久  
喇嘛扎卜等來謂曰汝等前來之故我汗皆知  
之我汗言兩庫圖克圖亦不必見也汝且歸我  
將導汝出境是以我等歸來未幾濟隆遣衛徵

格隆噶爾丹遣尊多伊格蘇爾為使見臣等於  
前鋒營述噶爾丹之言曰

聖上君南方我長北方我與中華一道同軌雖入邊汎  
索吾讐而已弗秋毫犯也乃今聞使侍衛阿南  
達率兵來至葫蘆谷爾河與兩尚書會阿南達  
奉

命使於我者數矣我亦常饗之今講信修好宜遣之  
來議否則亦當遣尊於阿南達等者奏至

上命示議政大臣

遣侍郎額爾黑圖整飭驛站

上諭大學士伊桑阿等曰驛站奏報軍機關係重大其令侍郎額爾黑圖自此至裕親王軍自王軍至阿密達軍整飭驛站其兵部侍郎薩木哈檄之令回

庚戌

命內大臣伯費揚古等往會大將軍裕親王福全軍時費揚古及都統班達爾沙等奉

命赴科爾沁至布爾哈蘇圖地方與科爾沁軍會費  
揚古具奏以

聞

上諭曰費揚古等不必與科爾沁兵齊來令速赴裕親  
王軍并檄蘇爾達等知之

辛亥

諭大將軍裕親王福全等時報大軍進止并噶爾丹  
情形

上諭裕親王等曰爾軍進止與哨探噶爾丹所在宜不時報聞今朕與爾相距僅三百里而往來之信常遲非軍機所宜也其不時做飭王等奏言前者遣

石圖率前鋒哨探今阿密達報稱厄魯特十八日至敖布喇克越二日前徙於布立圖扎營視其情形將往達爾腦兒臣等議若彼乘間過克一奔口則難追及已檄蘇努阿密達等兵速來二十四五兩日內可與臣軍會噶爾丹若至克

一奔口則二十六七必與相遇臣等謹設斥堠  
整兵前進石圖還有聞當別奏

壬子

命恭親王常寧率兵赴土爾埂伊扎爾之地

上諭都統喀代等曰今裕親王軍既在土爾埂伊扎爾  
其諭恭親王不必赴拜察令往會裕親王

甲寅大將軍裕親王福全等奏報遺書噶爾丹  
給之牛羊先是

上諭裕親王等曰今兵漸與敵近斥堠宜嚴明噶爾丹處應作何羈縻以待盛京烏喇科爾沁之兵王等其遺之牛羊以老其銳氣疑其士卒商南多爾濟諳晰情形可與商也至是裕親王等奏言據噶爾馬等報厄魯特兵駐弼勞口濟隆庫圖克圖所遣使人顧魯格噶爾丹所遣使人哈灘和碩齊至<sub>臣</sub>軍中顧魯格告曰我庫圖克圖曾遣使於阿密達大人軍言達賴喇嘛諭噶爾丹曰爾向

與

中華皇帝和好今追索土謝圖汗折卜尊丹巴不已倘  
因此有隙必至貽患衆生不獲寧所噶爾丹祇  
遵其諭故令我等往告中華大人臣思大兵既  
出彼必知之臣等今往克一奔而噶爾丹又駐  
弼勞口欲回趨拜察以禦之又恐彼向西而往  
噶爾丹狡詐多端踪跡難定大兵迂回猝難調  
遣不若暫駐哈卜他海海他哈地方再定所向



臣

又遣濟隆庫圖克圖及噶爾丹之使偕驍騎校克什圖原任員外郎達賴遺以羊百頭牛二十頭持臣及皇長子書語之曰我與汝道法相協和好有年今汝追喀爾喀入我邊汎

聖上特命我等論決此事永久和好今汝使人言我汗已敬遵達賴喇嘛之諭夫講信修禮所關重大此役既就則一切皆宜矣今將於何地會議務定一所以決大事因遣書之便敬以牛羊為餽

臣等不知諸軍至何地可待則待之如不可待  
則量力而進耳

命定領軍諸大臣迎戰行列大將軍裕親王奏言蘇  
努阿密達等兵俱已來會噶爾丹聲息漸近

臣

等今分大軍為三首隊每佐領護軍五名次隊  
每佐領護軍二名驍騎一名兩翼每佐領護軍  
驍騎各一名前鋒各二百名夸蘭大及將領等  
員

臣

等酌量分派餘前鋒四百名留

臣

等左右

以備策應至三隊大帥重任也自叅贊大臣以下副都統以上在行間者皆奮欲前驅惟

皇上所命奏入

上諭曰火器營大帥不必易首隊令前鋒統領邁圖護軍統領楊代副都統查木素色黑老蠻色海蘭嵩書吉爾他布阿爾尼率之次隊令都統楊文魁副都統康喀喇伊勒塞格音率之兩翼令公蘇努彭冲率之內大臣國舅佟國維內大臣索額圖明珠

阿密達與王等親督指揮視何處當應援親率兵  
赴之扎努喀朱爾蘇居皇長子左右其恭親王軍  
到聽大將軍調用至噶爾丹使人速遣之

丙辰

上自鷹莊回鑾時

駕出塞外被暑是月十六日至鞍匠屯

御體違和仍力疾前進二十日至青城次日扈從諸臣  
奏曰時當炎熱行幄薰蒸敢請

聖駕回至佳善之地暫為游息調攝

聖躬二十三日

上乃回鑾二十四日至鷹莊駐蹕扈從諸臣又再三叩

請

御駕回京調理二十七日

上於是緩轡徐還京師

戊午大將軍裕親王福全等奏報遣使遺書於

濟隆庫圖克圖裕親王等奏言濟隆庫圖克圖

噶爾丹遣使人齎濟隆書偕克什圖來內言前者我偕

皇上使臣伊拉古克三庫圖克圖和好之議幾成而尚書遽爾用兵遂至敗議思

聖上與博碩克圖汗之意原無不協也是以余與博碩克圖汗俱遣人至京陳奏今博碩克圖汗確知其讐言所在追躡至此余恐厄魯特喀爾喀彼此致有損敗謹以修好之利為彼陳之亦期有裨

於折卜尊丹巴土謝圖汗以副

皇上之意而已其作何修好幸明示之等語問之克什圖言至彼時噶爾丹之弟丹濟喇取書以去不使我等見濟隆及噶爾丹也

臣等欽遵

諭旨以遣使羈縻為務仍令前使持書往答曰尚書阿爾尼等倉卒進兵以至交惡久經奏

聞今因博碩克圖汗索土謝圖汗折卜尊丹巴之故聖上特遣我等來議永定和好博碩克圖汗既近我地

乞近至烏闌布通應以土謝圖汗折卜尊丹巴  
界汝與否各遣貴顯大臣定議博碩克圖汗屢  
以未嘗犯我國為辭今乃掠我屬界執其部長  
不幾背前言乎今以濟隆言定議修好是以遣  
使奉書等語但噶爾丹素行狡詐未必不於克  
什圖歸來之前進兵臣等當併力禦敵務期不  
失機會



聖祖仁皇帝親征平定朔漠方畧卷七

欽定四庫全書

史部

平定朔漢方略卷八

詳校官編修臣曹振鏞

編修臣裴謙覆勘

總校官進士臣繆琪

校對官中書臣朱圻

謄錄監生臣陳昌敬

欽定四庫全書

聖祖仁皇帝親征平定朔漠方略卷八

八月庚申內大臣索額圖奏報員外郎阿爾必  
特祜歸自噶爾丹先是

上遣阿爾必特祜等赴索額圖軍前使於噶爾丹至是  
索額圖奏言阿爾必特祜等歸偕濟隆庫圖克  
圖使人拉木扎木巴噶爾丹使人尊對格蘇爾  
至營問其情由阿爾必特祜等述噶爾丹之言

曰所有情事已同滿丕等遣使上奏不復具疏  
但以書問王與皇長子內大臣安請遵商南多  
爾濟所傳

明旨以土謝圖汗折卜尊丹巴速去畀我述濟隆之  
言曰達賴喇嘛所以遣我者為

聖上與噶爾丹向來和好且皆我施主無分內外但急  
欲定此大事以早復命耳此事非王及皇長子  
內大臣親身就我或我親身來面議不能定也

又視來人形狀甚覺倉皇有窺探大軍意厄  
魯特現至烏瀾滾地方覓山林深塹倚險結營  
又聞其祭旗誦經距我軍僅四十里

辛酉大將軍裕親王福全等奏報擊敗噶爾丹  
於烏闡布通裕親王等奏言七月二十九日

臣

等聞厄魯特屯於烏闡布通即整列隊伍八月  
初一日黎明前進日中見敵設鹿角鎗礮列兵  
徐進未時臨敵發鎗礮擊之至山下見厄魯特

於林內隔河高岸相拒橫卧駱駝以為障蔽自  
未時交戰至掌燈時左翼由山腰捲入大敗之  
斬殺甚多右翼進擊為河崖渾泥所阻回至原  
處而立本欲盡滅餘賊但昏夜地險收兵徐退  
其噶爾丹死於亂兵與否俟後查明另奏外事  
關大敗賊衆謹以

奏

聞得

旨覽王等所奏統領大軍進討厄魯特至烏闌布通  
大敗賊衆斬殺甚多王等調度有方官兵奮勇可  
嘉在事有功人負著議叙具奏

命撤回寧夏駐防兵

上諭議政大臣曰前於西安發滿兵二千漢軍一千往  
寧夏駐防今已大敗厄魯特此所備兵著撤回西  
安其綠旗兵亦令各回本汛速檄康親王等偵探  
厄魯特敗兵奔潰者即發兵堵剿并檄知四十九

旗各部長

趣大將軍裕親王福全等速進兵追勦

上諭裕親王及叅贊王大臣曰卿等奏報大敗噶爾丹  
疏初三日已到此皆

上天鑒臨

祖宗默祐諸王大臣盡心官兵効力之所致也朕聞之焚  
香謝

天不勝欣悅此後當何以窮其根株平其餘黨孰壽始末



一舉永清勿留遺孽其詳議以聞裕親王等尋奏  
言八月初一日擊敗噶爾丹薄暮收軍次日即  
前進勦殺餘寇見噶爾丹所據險惡堅壁拒抗  
故使我將士暫息而噶爾丹適遣伊拉古克三  
庫圖克圖來復理前說請以土謝圖汗折卜尊  
丹巴界之且云一二日內濟隆庫圖克圖即來  
講禮修好臣等悉遵

聖諭數噶爾丹前後逆惡而遣之矣初四日濟隆果率

其弟子七十餘人來臣等營外設幕迎入帳中

臣及皇長子叅贊王大臣授之信帕就坐濟隆

言博碩克圖汗信伊拉古克三及商南多爾濟

之言深入邊內部下無知搶掠人畜皆大非理

聖上乃一統宇宙之主博碩克圖汗不過小部頭目何

敢妄行但索其仇土謝圖汗及折卜尊丹巴致

有此誤彼今亦無索土謝圖汗之意但祈

聖上慨允以折卜尊丹巴遣送其師達賴喇嘛榮光莫

大矣余曾語噶爾丹汝既求以禮修好不當逼處宜遠駐以待故使回就水草之地相候臣等謂之曰土謝圖汗折卜尊丹巴即有罪愆

皇上自加罪責豈有因噶爾丹之言遂遣送達賴喇嘛之理因待汝來稽我行事我今即前進矣濟隆言余歸當力說噶爾丹勿索折卜尊丹巴而出邊外臣等詰之曰汝往來行說能保噶爾丹不乘間奔逸掠我境內人民乎濟隆言王及諸大

臣仰體

聖上仁心休征罷戰彼焉敢行劫斷不遠去必待我也

臣等謂之曰汝雖保噶爾丹不敢妄行但我各

路兵分行進剿伊等不知汝來講好齊進亦未

可定濟隆惶迫曰如此事敗矣將奈何臣等謂

之曰我軍遇厄魯特即行掩擊必然之勢也我

等仰體

皇上好生許汝所請當各發印文一道與各路領軍諸

王大臣汝執此往不論遇何路軍兵即令送本  
路王及大臣即止不擊也因付以檄康親王土  
謝圖親王達爾漢親王內大臣蘇爾達都統額  
黑訥副都統馬席印文各一道濟隆大喜又  
等欽遵

前旨給濟隆黃蟒袍一領緞九端白金百兩又給濟  
隆前所遣三弟子袍緞濟隆先遣兩弟子馳報  
噶爾丹<sup>臣</sup>等思噶爾丹乃狡詐之人雖不可全

信但戰之次日屢遣人來必多窘迫臣等欲即  
進勦則厄魯特據險堅拒且

聖諭屢行誡飭務期兵卒不致太勞計一舉滅之假其  
往來講解之間俟

盛京烏喇科爾沁諸軍之至齊行夾擊滅此狡寇  
如有可除之機斷不誤也

命議政大臣集議議曰大將軍王等既大敗厄魯特  
乃不即行勦滅明知濟隆行說以誤我軍而故

聽之豈不坐失事機請

勅大將軍王等作速追勦可也得

旨出征諸王大臣當同心効力大將軍王與皇子失  
誤機宜衆大臣不正言抗拒阻軍律甚明歸時斷不  
姑宥此役所關甚鉅今科爾沁烏喇盛京之兵初  
四五間可至達爾腦兒矣若又失機會不進逼之  
王與大臣此行何所事事耶

臣謹按帝王統馭區宇必攘外而後能安內

唱爾丹一日不滅則邊境一日不寧中國之  
徵兵籌餉一日不息

皇上命將出師授以方略聲罪致討敗敵之後又嚴促  
進勦意在盡絕根株無使滋蔓真師有成律  
算無遺謀者矣向使諸王大臣同心協力稟  
承

諭旨奮迅窮追何難尅期掃蕩以成一勞永逸之功  
而乃誤失機宜致使逋寇稽誅復煩



聖主數年之宵旰臣編緝至此益以知

睿慮周詳

廟謨深遠非諸王大臣所能及其萬一者也

乙丑

車駕還京師

丙寅

命都統希福馳驛赴大將軍裕親王軍前叅贊

命兵部監牧八旗馬匹

上諭議政大臣曰軍需以馬政為急其令每佐領馬各  
以十匹交兵部委官監視牧養肥壯以待有事之  
用如本兵有所差遣仍取原馬騎用至不用之時  
仍各繳還兵部令馬主記明顏色

辛未

命皇長子胤禔還京師內大臣公福善等奏曰向者  
遣

皇長子以有攻戰之事使親率士卒而行也今厄

魯特噶爾丹已敗歸矣所有不過會議事件並無交戰之事應令

皇長子酌帶隨從人等乘驛先回其餘大臣侍衛執事人役各乘其馬量馬之力從容而行

上從之

癸酉噶爾丹以誓書乞和先是大將軍裕親王等奏言噶爾丹迫於追襲自什拉磨楞河載水橫度大磧山連夜遯走剛阿腦兒臣等欲追而

馬力不能前進又恐噶爾丹去遠因與濟隆庫圖克圖約使噶爾丹近我而止以定禮好遣侍衛吳丹護軍叅領色爾濟等偕濟隆往諭之如盛京烏喇諸部落兵俱集噶爾丹在近則協力進剿乃前所遣各路趣兵筆帖式來福回云初九日於噶爾達泰河遇

盛京烏喇科爾沁諸部落兵距大軍有百餘里土謝圖親王沙津達爾漢親王班第內大臣蘇爾

達

盛京將軍綽克託烏喇將軍薩卜素言厄魯特已  
往達爾腦兒河去矣我軍如赴格勒弼勞則在  
厄魯特後今當往教布喇克邀擊之若議好則  
姑待大將軍王等語至是裕親王等又奏言吳  
丹色爾濟與濟隆帶噶爾丹使人達爾漢格隆  
西達額爾克寨桑持書至告曰噶爾丹跪於威  
靈佛前稽首誓曰若違此書惟佛鑒之其書詞

云達賴喇嘛明鑒遣濟隆額爾德尼來責以禮  
法今倘蒙

皇帝惠好則自此不敢犯喀爾喀謹以印文為驗云

臣

等閱書未載誓詞仍遣濟隆等歸開諭噶爾丹  
增書誓詞

臣

等竊思噶爾丹見

盛京烏喇科爾沁諸軍形勢不由原路抄出西北  
希林河而奔逃亦未可定若沿途擄掠諸部落  
則我民被其害聞是月初九日掠克西克騰三

佐領搶去羊二萬餘牛馬一千餘前噶爾丹與  
吳丹色爾濟約自立誓以後不少犯矣今若果  
從伊拉克三濟隆之言輸誠向化將書備載誓  
詞<sub>臣</sub>等請給以印文許其歸好奏至

命議政王貝勒大臣集議議曰噶爾丹乃極狡詐之  
人屢遣人以立誓為辭今劫掠克西克騰之三  
佐領矣誓言好不可深信蘇爾達等軍已到應立  
行勦滅但王等親在軍中事皆目擊應准所奏

令噶爾丹堅誓而釋之王等仍率大軍駐彼探  
噶爾丹出邊遠去實音令蘇爾達等軍照常防  
守

上從之

乙亥

諭量撤官兵

上諭議政大臣曰今噶爾丹敗遁漸遠應將無馬兵丁  
酌量撤回再將隨軍二次駱駝所負之米分給無



糧兵丁以此駱駝將運到坡賴村之米裝載以迎  
大兵至邇來部落蒙古內有出首與噶爾丹潛通  
往來者彼此仇扳誣陷亦未可定其一併議之議

曰

上諭極當應一一欽遵至出首與噶爾丹潛通往來者  
或借端誣陷應俱免其察議俟

命下之日檄大將軍裕親王等傳諭可也

上從之

丙子噶爾丹上書請罪大將軍裕親王等奏言  
十一日遣伊拉古克三赴噶爾丹十五日賁噶  
爾丹奏章還其詞曰伏蒙照鑒下情普使安全  
正在懽忭伊拉古克三庫圖克圖來諭以禮法  
事永圖至信理所宜然未知如何可以贊襄  
王事伏冀

至仁皇帝鑒察謹上書為永遠不絕之信誓云又伊拉  
古克三云噶爾丹頂佛像設誓曰我自恃理直

追索土謝圖汗折卜尊丹巴而深入邊汎置佛  
天於前而不以已之罪為罪可乎佛天以仁恕  
為心

聖上即佛天也乞鑒宥我罪凡有

諭旨謹遵行之今往界上視水草善地無人之處駐  
扎候

旨尋又據濟隆持噶爾丹誓書來且述噶爾丹之言  
曰我蒙王及皇長子大臣見憐我正懼忤伊拉

古克三來諭以永遠歸好之意我思倚

皇上以為生今往界外駐候

聖旨<sup>臣</sup>等思噶爾丹軍敗力窮觀其語不敢抗拒

皇上天威籲請寬宥有倚我求生之意雖不可深信既

恭順奏請伏祈

睿裁奏至

命議政大臣集議議曰噶爾丹不敢抗拒

天威設誓請罪既獻誓書適符

皇上好生之心請准其所並令出邊候

旨再檄裕親王內大臣蘇爾達等仍俟噶爾丹出邊

另行請

旨撤兵議入

上許之隨遣侍郎額爾赫圖等同伊拉古克三賁

勅往諭噶爾丹

勅曰朕統御宇內率土人民皆欲使得其所雖窮壤異域之民亦必撫育各享安樂此本願也前者喀

爾喀為爾所敗來歸於朕朕以天下之人皆在朕  
覆育之中扶衰濟困乃元后當行之事故受而育  
之並非利七旗喀爾喀之土地況朕興滅繼絕之  
意非啻喀爾喀為然諸窮困來歸者一體撫而養  
之是亦諭爾勅中所有也爾厄魯特喀爾喀兩相  
構怨何所底止必至塗炭朕與達賴喇嘛仁愛為  
心特欲使爾兩國和好罷戰共享安樂達賴喇嘛  
遣濟隆庫圖克圖朕遣伊拉古克三庫圖克圖商

南多爾濟往赴爾所爾乃達達賴喇嘛之教及朕之旨以追喀爾喀為名率兵入我邊汛行劫烏朱穆秦朕雖聞之尚未深信我朝用兵越險阻踰山海以闢疆土抗拒者誅之而已無有他人入犯我境者爾噶爾丹博碩克圖豈不知之後聞汝深入騷擾朕仍念爾向來職貢通好是以遣和碩裕親王及皇長子等授之以兵與汝共議非令討汝也爾衆先動我兵始舉是戰之後王及大臣奏請再

戰而朕止之盛京烏喇科爾沁軍又請與戰朕又  
以待爾回奏而止之今爾以誓書來請罪求和王  
及大臣體達賴喇嘛及朕好生之素心按兵不行  
追殺爾今率爾兵出塞而居不得擅犯我屬下部  
落喀爾喀一人一畜亦不得有一人與衆部落往  
來通使爾倘有窘迫奏聞於朕朕必如前旨撫養  
斷不念爾舊愆若再違抗言妄行劫奪生事朕厲  
兵秣馬現俱整備必務窮討斷不終止



丁丑

命預備官兵防噶爾丹背盟

上諭議政大臣曰噶爾丹雖認罪立誓上書請降但人殊狡詐難以深信我大兵撤後背盟妄行亦未可定且諭噶爾丹勅內有厲兵秣馬現俱整備之語仍宜發兵預備萬一有悖亂之信則夕聞朝發即可撲滅若待有變而後發兵緩不及事矣現在各佐領有喂肥馬匹著每佐領派護軍七名甲兵五

名六名整頓備之其即會議議曰

諭旨甚當俱宜欽遵而行此所備兵應派每佐領護  
軍各七名每旗護軍叅領五員內以一員署為  
夸蘭大以護軍校二員署叅領每叅領派實授  
護軍校一員驍騎兵各五名每旗應派實授叅  
領一員署夸蘭大每叅領派署叅領一員散騎  
郎一員驍騎校一員又此所備兵亦應派出前  
鋒及火器兵綠旗兵現在每佐領派前鋒一名

每旗前鋒叅領一員侍衛一員無前鋒叅領之旗分則以前鋒侍衛署叅領火器營派兵二千以何項大臣率之而往將弁作何派出著火器營副都統具奏請

旨又現備於歸化城之宣府綠旗兵一千藤牌手一百大同備兵二千內撤回一千各於其地備之此兵仍著許盛鮑敬等率之遵化備兵一千仍著師帝賓率之以備遵化此所派發前鋒叅領

前鋒侍衛護軍叅領實授驍騎叅領署夸蘭大  
俱著各旗都統前鋒統領護軍統領親驗奏派  
署叅領散騎郎俱著各旗都統統領派出此軍  
每翼應派都統一員護軍統領一員副都統二  
員前鋒統領一員此所派大臣該部具奏其總  
統是軍者伏候

上裁奏入

上諭曰左翼軍令都統瓦代華善護軍統領洪海副都

統方格領之右翼軍令都統喀代護軍統領輝蘭  
副都統陶賴馬齊領之以陶賴署前鋒統領據議  
每翼派都統一員副都統二員今減去副都統一  
員其左翼特多派都統華善此軍非為出征而派  
也以噶爾丹雖降而人殊狡猾不可深信萬一叵  
測所以派出備之其以此故曉諭官兵知之

癸未大將軍裕親王福全等奏報撤回官兵裕  
親王等奏言<sub>臣</sub>等議每旗夸蘭大一員每叅領

章京一員前鋒叅領每翼二員侍衛二員其馬  
稍可者每佐領護軍二名前鋒二百火器營兵  
四百帶子母礮三門鐵心礮五門留後其餘護  
軍驍騎包衣兵領都統額黑訥班達爾沙護軍  
統領馬喇侍郎溫達副都統查木素噶爾馬老  
蠻色康喀喇塞格音張朝午領之於本月二十  
二日起行而回

盛京烏喇兵二十日已會大軍亦令撤回

臣所統

大軍俟吳丹視噶爾丹出邊回報另奏請

旨

九月戊子朔

諭免扣盛京出征官兵預借俸糧戶部奏言公綽克託侍郎阿喇密等借給

盛京出征官兵次年二月俸糧又違例借給五月錢糧應交部察議其借給錢糧應扣除補項

上諭大學士伊桑阿等曰盛京兵丁惟恃田禾月糧為

生去歲米穀不登貧民艱食故以屯糧散給近有  
戎事差一等待衛齊蘭布調盛京之兵諭以無馬  
者給以厰馬無糧者給之屯糧念官兵急遽啟行  
造次整頓器械借支俸糧因而星速啟行雖未嘗  
接戰伊等銳意滅敵殊為可嘉今若扣除貧苦兵  
丁艱於度日朕心甚為矜念其預給次年二月俸  
糧及五月錢糧免其抵扣以示朕優恤勞苦之意  
其擅給大臣亦從寬免交部察議



丁酉

諭操練禁軍

上諭大學士伊桑阿等曰我軍近與厄魯特戰排列太密為賊人亂鎗所中且進退並不鳴笳此皆不習戰陣之故也自古兵法無不預加訓練前者八旗之兵春秋校獵即訓練武備之意但校獵恐疲兵丁之馬今既停止校獵其令八旗兵丁春秋二季集於曠濶之地布陣鳴笳教演步伐

十月戊午朔

命大將軍裕親王福全等駐兵留後裕親王等奏言  
員外郎蒙古兒等原解米一千五百石支給大  
軍外給留後之兵扣至十月初十日止但伊拉  
古克三侍郎額爾黑圖自八月起程月餘不歸  
以此觀之噶爾丹似出邊遠道矣駐軍以待糗  
糧不足欲往駝運則堪用駱駝僅四百餘頭請  
檄喀喇沁王以車運致

上曰前王等疏言俟伊拉古克三等歸再請旨撤兵今聞大兵前來哈嗎爾嶺以內此乃朕圍獵最熟之地距有米之處纔二百餘里離喀喇沁既遠而欲動其兵馬以車運米此說甚謬議政大臣其集議之議曰大將軍等不行請

旨擅率大軍內徙俟歸日一併察議今伊拉古克三額爾黑圖等尚未歸應以前鋒護軍共四百名留大將軍處其餘兵卒及火器營兵俱令撤回

以車運米之請無庸置議應將坡賴村之糧酌量足留後兵之用所餘駱駝運往得

旨著裕親王索額圖明珠費揚古阿塞達留後其餘俱令還京餘如所議

癸亥

命分駐官兵於宣大等處以備調遣

上諭大學士伊桑阿等曰噶爾丹雖立盟而去其人狡詐不可深信著於陝西各營步兵內選素習征戰

人材壯健善於步行能用大刀連節棍者二千人  
戍守大同宣府以備明春有事時調遣再需善用  
藤牌大刀福建人數百駐於石硤以備調用古北  
口石硤之軍應設總兵官即令與該部會同選擇  
此駐防之兵張家口亦選步兵一千名駐扎即令  
宣府總兵官統之此兩處新設兵糧應較步兵錢  
糧增給議政王貝勒大臣其集議之議曰欽遵

上諭應檄川陝總督以陝西各營步兵內素經戰陣人

材雄健善於步行能用大刀連節棍兵二千其副將叅遊以下等官量兵派出著總督巡撫提督總兵官親選自延綏等處就近撥發以一千戍守大同一千戍守宣府此官兵行糧及家口坐糧該督撫照例給發期於十二月到汛俟來年夏月無事撤回古北口張家口各添設善用藤牌大刀兵一千檄山東山西河南巡撫以開墾福建人內或能用藤牌或能用大刀善於步

行者每省挑選三百名於十二月送到該部亦  
於京城酌量招募與各省兵共足一千以六百  
駐古北口四百駐石峽設總兵官一員副將一  
員遊擊二員守備四員千總八員把總十六員  
令總兵官駐古北口副將駐石峽遊擊以下等  
官各以其半分駐仍皆總兵官統之召募兵到  
該部會同總兵官選擇其設於張家口之兵著  
於直隸各營步兵內有人材壯健善於步行能

用藤牌大刀者著巡撫總兵官親選一千送往  
張家口所設統領官員亦照古北口石峽例令  
宣府總兵官統之此所設總兵官一員副將二  
員恭候

皇上簡授遊擊以下官員著總兵官選擇具奏此兩處  
兵皆每月給以銀二兩米照常支給奏入得

旨此兵務足額數朕當親閱古北口創設藤牌軍統  
轄之總兵官務選習於戰陣材技優長之人授之



使不時操練襄陽總兵官蔡元諳練戎事著有勞績著調授古北口等處地方總兵官龍泉營叅將王廷標著陞為副將其張家口副將員缺著兵部推補

丙寅

命撤康親王傑淑等兵

上諭大學士伊桑阿等曰康親王之軍今已無事王等及八旗滿軍綠旗兵俱撤回馬錫等兵亦撤回至

左翼四旗察哈爾旗下管旗叅領等官各身率該  
旗兵駐於正藍鑲白二旗之末防守勿離有警速  
報

甲申伊拉古克三庫圖克圖侍郎額爾黑圖攜  
噶爾丹奏疏還時噶爾丹敗遁出邊伊拉古克  
三額爾黑圖等賁

勅追及之噶爾丹具疏以謝疏曰向以一道同軌通  
使請

安貿易往來間因喀爾喀變亂使人失詞遂生小釁  
兩庫圖克圖來宣布

諭旨使歸於好

神聖垂慈不勝懼忭嗣以遠來糧畜匱乏妄行獲戾而  
伊拉古克三庫圖克圖傳

旨使全禮法仍歸和好既已加

恩又許陳情心甚喜悅惟有欽遵

諭旨奉行不違而已

命撤大將軍裕親王福全等兵

上諭大學士伊桑阿等曰大將軍裕親王兵著撤回及防守遵化州綠旗兵亦著各歸本汛

十一月戊子朔

諭車臣汗喀爾喀內徙以避噶爾丹劫掠

上諭理藩院曰馬第至奏噶爾丹已向俄僂爾去或襲車臣汗劫其餼糧亦未可定應令附近彼處之喀爾喀遊牧內徙其以此檄知阿南達

壬寅達賴喇嘛使人濟隆庫圖克圖請

陛見先是大將軍裕親王等奏稱濟隆庫圖克圖及其諸弟子與青海衆台吉使人來告臣前赴

京師請加

聖主尊號至是濟隆到

京進達賴喇嘛及厄魯特諸台吉奏章求面

聖請安

上諭曰朕與達賴喇嘛向皆念切生成以濟衆為務厄

魯特喀爾喀交惡相攻朕遣使於達賴喇嘛欲同  
定兩國之好達賴喇嘛甚喜而遣汝朕亦遣伊拉  
古克三庫圖克圖往說之如爾等能和兩國止其  
攻戰朕尚思加達賴喇嘛以嘉號爾等追及噶爾  
丹於克魯倫曾不宣諭止之反與同行殺掠喀爾  
喀而入邊汎劫奪烏朱穆秦克西克騰諸部落人  
畜朕稍出兵訊其情事爾在噶爾丹營中坐視其  
戰使厄魯特先動我軍不得已而擊之此皆爾等

不能仰體達賴喇嘛與朕好生之心以致喀爾喀  
破壞失所厄魯特敗亡甚衆職此之故朕甚憂見  
汝等復何請覲為也

甲辰達賴喇嘛率西海諸台吉及噶爾丹等具  
疏請上

尊號達賴喇嘛等疏曰虔誠望闕拈香散花上奏奉  
天承運宇宙至聖

皇帝睿覽伏以十乘諸菩薩為生靈下降出家則成佛

在家則轉輪光現三十二種各妙相總持四大  
部洲諸福輪威儀畢具在世小紀之理不下八  
萬歲而況論大紀則無量無涯也欽惟

皇帝陛下闢空門而無倚現七寶以轉鈞奉神力於壽  
夭自九重而錫福位正金獅之座恩澤覃敷文  
垂龍袞之衣祥光普照是以率邊境之君長向  
蓮跣而長跪仰見威行天討剪此兇頑

仁慈懷柔覃於衆庶謹上尊號曰



大慈普度恩寧錫福至聖上乘文殊皇帝虔修貢賀  
伏乞

天開淨目

輪發金光江水長流源源垂照歲在己巳月建星紀

除日吉旦謹奏

旨下議政王貝勒大臣集議議曰欽惟

皇上聲教所及遍於方隅

恩威所加極於覆載率土臣民莫不歸命矣今土伯

特厄魯特等蒙古諸國君長會集西海衆台吉  
以達賴喇嘛為首請上

皇上尊號此感恩懷德之舉出於至誠極敬之心自古  
以來藩國景從愛戴未有如今日者也臣等愚  
昧以為

皇上宜體諸藩誠請之心允受尊號納其貢物伏乞  
睿鑒

上諭曰朕統御宇內冀中外人民咸無戕賊共享昇平

是以前聞喀爾喀七旗兄弟不睦特遣使於達賴喇嘛欲使歸好達賴喇嘛遣噶爾丹西勒圖朕遣尚書阿爾尼前往而伊等所行不能仰體朕心及達賴喇嘛之意雖已和喀爾喀七旗而喀爾喀與厄魯特相仇之故實從此起後聞交惡興戎即遣使於達賴喇嘛達賴喇嘛遣齊緝克他賴堪布朕遣阿齊圖綽爾濟學士拜里等止彼相攻乃伊等不行宣諭止之聽其縱戰喀爾喀遂為所敗朕不

恐坐視復遣使達賴喇嘛相與同定兩國之好達  
賴喇嘛遣濟隆庫圖克圖朕遣伊拉古克三庫圖  
克圖往說之詎意兩人見噶爾丹不行諭止與之  
偕行闌入邊汛搶奪人畜朕出兵問罪而兩人又  
不為諭止立視其戰我軍不得已而擊之致厄魯  
特大敗遠遁請罪朕與達賴喇嘛期於撫育衆生  
而使臣故違意旨遂至於此如能使兩國和好朕  
尚欲加達賴喇嘛嘉號此皆任事行人不能仰副

朕心及達賴喇嘛之意或以貪得其和不成是以  
喀爾喀殘破厄魯特喪敗朕心甚為隱痛有何可  
賀而受尊號乎其以是曉諭達賴喇嘛諸汗衆台  
吉來使貢賀禮物其併發還

優陞克西克騰四等台吉莫倫等為一等台吉

理藩院奏言克西克騰四等台吉莫倫噶爾必  
哨探斥堠著有勞績俱應陞一級

諭曰莫倫噶爾必哨探斥堠効力甚多俱著優陞為

一等台吉其以此曉諭諸部落

已酉

治烏闌布通交戰諸王大臣罪叙火器營左翼官兵  
功先是大將軍裕親王福全叅贊諸王大臣率  
兵還

京師

上命王及大臣止宿城外聽勘至是信郡王俄扎等取

供議罪奏言

皇上深慮噶爾丹奸狡此役不行剿除必貽後患多派  
精兵盡發火器以裕親王福全為大將軍王大  
臣為叅贊指授方略務期盡滅根株乃福全等  
調度乖方既經戰勝不能乘機剿滅收兵又不  
鳴笳賊敗不行追殺反行文禁止蘇爾達等進  
兵以致窮寇遁逃殊誤軍機且未經請

旨率兵擅回哈嗎爾嶺內應將裕親王福全恭親王  
常寧簡親王雅布俱革去王爵福全撤去三佐

領國舅內大臣佟國維內大臣索額圖明珠阿  
塞達俱草職都統公彭冲前鋒統領班達爾沙  
護軍統領楊代苗齊納俱解任都統宗室蘇努  
喇克達都統阿錫坦諾邁不准叙功內大臣蘇  
爾達費揚古都統希福副都統色黑老蠻色俱  
罰俸一年散職大臣扎努喀草職奏入得

旨噶爾丹於烏闌布通為我軍擊敗遁走而領兵諸  
王大臣不復追殺反信濟隆庫圖克圖議好之誑



詞遣人語內大臣蘇爾達等令盛京烏喇諸路兵  
勿與之戰是以噶爾丹奔竄過盛京烏喇科爾沁  
軍營竟不邀擊縱之使去其時蘇爾達欲羈縻噶  
爾丹與土謝圖親王沙津達爾漢親王班第等公  
同商議選差公主之子阿喇善下人俄齊爾及郭  
爾羅斯台吉吳爾圖納蘇圖旗下佐領祈他邁往  
令噶爾丹且止將與之會語噶爾丹不少留倉皇  
宵遁如使蘇爾達等邀擊之則噶爾丹可以就擒

矣伊等不戰乃大誤也福全等俱應依議治罪但此舉已擊敗厄魯特兵噶爾丹遠遁諸王大臣槩從寬免草福全常寧罷議政與雅布俱罰俸三年福全撤去三佐領佟國維索額圖明珠蘇努喇克達阿錫坦諾邁俱罷議政與阿密達彭冲班達爾沙楊代苗齊納各降四級留任蘇爾達費揚古希福俱免罰俸色黑老蠻色俱罰俸一年扎努喀著革職火器營左翼戰功照常議叙嗣兵部議叙以

火器營官兵及左翼交戰將士為頭等軍功

十二月己未

命賜噶爾丹白金千兩噶爾丹奏言自喀爾喀變亂以來貿易不行籲請

恩賜白金以育衆庶理藩院及議政諸王大臣議以厄魯特汗諾顏台吉無賜白金之例

上曰噶爾丹籲請懇切著賜白金千兩

聖祖仁皇帝親征平定朔漠方略卷八

欽定四庫全書

聖祖仁皇帝親征平定朔漠方略卷九

康熙三十年正月癸巳

諭倣備噶爾丹時噶爾丹奏言其下人如狼有一二  
妄行者祈勿介意奏至

上諭大學士伊桑阿等曰閱噶爾丹所奏不可謂無作  
亂之事今噶爾丹所屯自俄儂向喀爾喀墨爾根  
濟農而來火器重物難以應時即至應令八旗漢

軍都統選舉能員預運大礮前至大同宣府駐劄  
山中有木隨便採取置備鹿角應運礮幾門如何  
運致造鹿角幾何八旗漢軍都統議奏又前曾令  
各佐領秣馬十五匹後減去五匹今仍令如數秣  
養所養馬數令兵部記冊又聞此番出征厄魯特  
兵丁甲冑既不相稱又不堅固今傳令好為配合  
整頓堅固有欲製護心綿甲者隨便製造出征大  
小官員將所有丁壯抽取護身致戰陣之上反無

丁壯大小官員親隨甲士各有家人以後軍中抽取應令停止亦令兵部議奏此番兵丁原令帶兩月米聞僅帶有二十日亦令嚴飭以後照數攜帶  
戊申

命戒會閱之期

上諭內大臣蘇爾達等曰喀爾喀案件宜速斷理擬於清明前後青草發萌時出臨會閱其集議之議三月青草發萌時應出臨會閱其隨從大臣

官員兵丁及會閱應行事宜令各部院請

旨啟行日期恭候

上裁奏入

上從之

封阿魯科爾沁貝勒垂為多羅郡王先是貝勒垂於  
烏爾揮地方與厄魯特戰衆皆奔潰垂獨止力  
戰致受重創被執不屈

上嘉之至是封為多羅郡王其在事陣亡阿魯科爾沁



等部落十二旗台吉官員理藩院分別議叙具  
奏

上曰扎魯特四等台吉滾楚克塞爾濟額爾德尼及阿  
魯科爾沁二等台吉董約特勞績顯著歿於戰陣  
其優贈為一等台吉賜達爾漢之號令其子承襲  
全給身價餘俱全給身價

命都統瓦代郎坦往備大同張家口先是噶爾丹認  
罪立誓言上書請降

上以噶爾丹人殊狡詐宜發兵預備著每佐領派護軍  
七名驍騎五名前鋒一名火器營兵二千整頓備  
之至是

上諭內大臣蘇爾達等曰噶爾丹來至克魯倫又劫掠  
喀爾喀今或乘雪前來為寇亦未可知所發備兵  
宜前往張家口獨石口等地方備之著議政大臣  
領侍衛內大臣八旗滿洲蒙古漢軍都統集議議  
曰前派兵每佐領護軍七名驍騎五名前鋒一

名火器營兵二千今以此軍分遣張家口獨石口則張家口應遣每佐領護軍四名驍騎二名前鋒兩佐領合一名火器營兵一千獨石口應遣每佐領護軍三名驍騎三名前鋒兩佐領合一名火器營兵一千奏入得

旨赴張家口軍令往大同赴獨石口軍令往張家口其張家口一路都統瓦代總領之與都統喀代王永譽護軍統領洪海副都統方格柯爾對喻維邦

偕往大同一路都統郎坦總領之與都統公宗室  
華善都統李正宗護軍統領宗室惠藍署前鋒統  
領副都統碩鼐副都統馬齊田象坤郎化麟偕往  
此二路俱授將軍印自漢軍副都統以上俱令叅  
贊餘如議隨授瓦代定北將軍印郎坦安北將軍  
印

辛亥

命派發會閱官兵兵部奏言

車駕出闕應撥前鋒營則前鋒統領一員每翼叅領  
各一員侍衛各一員每旗前鋒校各二員前鋒  
兵三十名護軍營則每翼護軍統領各二員每  
旗護軍叅領各七員每叅領護軍校各五員每  
佐領護軍各五名驍騎營則每翼都統各二員  
副都統各四員滿洲蒙古每旗叅領各一員每  
叅領賢能將領各二員驍騎校各二員小校各  
四名驍騎每佐領各三名其都統副都統前鋒

統領護軍統領惟

上簡命其八旗每旗礮位火器攜帶幾何大臣官員兵  
丁撥發幾何俱聽火器營都統副都統等具奏  
請

肯護軍每旗帶毒藥一桿驍騎每叅領帶毒藥各一桿除  
上三旗護軍守衛

御營外其五旗護軍八旗驍騎火器營兵每旗各扎  
一營以為行止奏入

上從之隨令都統莽吉祿喇克達諾敏希福蘇努前鋒  
統領穆圖護軍統領四哥托倫馬喇苗齊納副都  
統馬思喀沙納海碩代伊勒慎趙山勞滿塞牛鈕  
葉楚赫等隨赴會閱

士子

命西安將軍尼雅漢等往備寧夏

上諭大學士伊桑阿等曰聞噶爾丹劫掠墨爾根濟農  
巴圖爾額爾克濟農向西海而去著將陝西西安

兵酌留守城外其餘兵丁命將軍親率之其川陝  
督標綠旗兵命總督親率之寧夏鎮標兵命總兵  
官親率之俱於寧夏備噶爾丹趙良棟現在寧夏  
熟習軍務令與將軍總督指揮商略而行時勇略  
將軍趙良棟解任見佳寧夏故有是

命

諭給賞宣府大同兵

上諭大學士伊桑阿等曰宣府大同兵雖未嘗攻戰而



兩次出邊修整器械亦已勞矣今又令將軍等於  
有事時便宜率之而行宜加恩賚每一兵賞銀四  
兩交大同宣府總兵官頒給

二月戊午策旺喇卜灘及阿奴等覆奏與噶爾  
丹交惡情事策旺喇卜灘疏曰侍讀學士達虎  
頒到

勅書恩賞不勝欣幸我國內自交惡因柰冲鄂木卜  
擅權毒殺我弟與我亦不睦我國人民交惡離

散職此之故阿奴疏曰我等奉達賴喇嘛之令  
分出博碩克圖汗達達賴喇嘛教多為不義殺  
索諾木喇卜灘又與策旺喇卜灘及我亦皆反  
顏是以各自分散嗣後

大君凡有

諭旨俱願遵行理藩院以

聞

上命厚加恩賜而遣之并令郎中桑格護其行其使人

起行之前令見噶爾丹來使告以故

丁卯

遣使賫

勅諭噶爾丹

上諭大學士伊桑阿阿蘭泰尚書馬齊班第等曰侍衛  
阿南達來奏言適獲一噶爾丹營中同行喀爾喀  
問之言噶爾丹去年敗走以來日以北徙人畜屢  
斃劫掠無所獲近者噶爾丹親率兵來劫喀爾喀

至阿爾哈賴地方又無所得皆徒步而返困敝已極今應於現在此地噶爾丹使人內撥發數人令巴扎爾賚勅乘驛與之同往噶爾丹所至巴圖爾額爾克濟農墨爾根濟農善巴額爾克帶青處各遣官一員令伊等皆內徙遠置哨探再語伊拉古克三庫圖克圖令明告此去噶爾丹使人云汝輩厄魯特之人從噶爾丹而行失其生計主上憐之故遣汝等傳諭噶爾丹若降當厚加恩養若上果念

汝等厄魯特前惡則不令策旺喇卜灘使人見汝等矣巴圖爾額爾克濟農遣二郎保往墨爾根濟農善巴額爾克帶青者與阿南達議亦遣向日往來相識之人往

賜噶爾丹勅曰朕為天下一統主務使四海之內人民咸獲其所以享太平雖向與本朝抗拒之國如窮迫來歸必拯而養之無不使得其所者喀爾喀向曾與本朝交戰窮而來歸朕並不念前罪受而

撫養之朕濟困繼絕之心不但於喀爾喀為然也  
諸國有窮迫來歸者朕之撫養皆與此同前已有  
旨諭汝矣今聞喀爾喀逃來人等言汝厄魯特牲  
畜已盡無以為食極其窮困人被疾疫死亡相繼  
朕重念天下率土人民之命聞此困敝有不惻然  
軫念者乎況前已致諭於達賴喇嘛言噶爾丹如  
不得已而來歸朕亦受而養之使之得所今果窮  
困無食不能歸故土其移近邊汛朕當厚加恩賜

如決計入降益從優撫養斷不辱汝此朕俯視率  
土人民一體之實心勿貳勿疑汝亦曾誓不侵擾  
喀爾喀況我軍已在在設備矣若朕果有憾汝困  
窮之事則不使策旺喇卜灘使人見汝之人如此  
情事汝使亦皆知之自此以後汝之人無所劫奪  
不能歸故土衆庶益至死亡雖悔莫及汝當熟籌  
之特遣員外郎巴扎爾偕汝使內七人往諭汝其  
定計具本來奏

臣謹按帝王之量主於兼容并包故雖遐荒  
負固自外於聲教之倫未嘗不閔其昏迷而  
冀其覺悟思引掖以歸大化此至仁者之用  
心也我

皇上於噶爾丹欲令保境息爭前此屢遣使臣申以勅  
命不憚再三至其入犯邊哨既以逆我顏行  
天戈所指人切同仇而

帝德好生猶望其親見用兵之害庶幾窮蹙來歸故重



宣使命開以自新於其屬下人等亦徧示招徠以定反側所謂推赤心置人腹中毫無芥蒂於夙讐者也

聖度如天因噶爾丹之冥頑不悟而益顯矣

乙亥將軍郎坦等請帶綠旗官兵前進兵部奏將軍郎坦等咨稱本路兵於二月十三日至大同與叅贊諸大臣及總兵官王弼等同議地方綠旗兵共一萬五千餘人陝西撥來綠旗兵一

千人如行軍之時宜發陝西調來兵一千大同  
兵四千共五千人前往其管領將弁亦量兵數  
派出又訓練大同綠旗兵礮火遣有八旗漢軍  
將校各一員礮手各一名教習今猶未盡嫻熟  
倘有行軍之事亦併帶往應准該將軍所請奏  
入得

旨此所請帶往之兵過多如有事著帶陝西調來兵  
一千大同鎮標兵二千前往餘如議

丁丑

命增設西安八旗火器兵將軍尼雅漢奏言目下將  
西安所有漢軍二千內擇一千官員亦分半教  
習鳥鎗實大有裨於地方戰守但陝省遼濶境  
土皆切近外藩三面交界不同他省如有軍機  
之事各處調度必將此一千火器兵分用力分  
則不全矣火器者所以攻堅陷陣之急需也必  
多而整始大有濟今擬將西安八旗滿洲蒙古

漢軍丁壯及家人廝役內不論旗分擇其人材  
雄偉者創增一千人專管教習滿洲官亦創令  
增設共以兵二千為全數設立火器營遵

欽定之式用心訓練於七千兵內撥滿兵一千漢軍  
一千連家口安插蘭州城附近邊塞倘有軍務  
連綿絡繹不悞軍機而兵威震耀於內外

皇上似可少紓西顧之憂矣奏至

命議政王貝勒大臣集議議曰應照該將軍所奏將

西安八旗滿洲蒙古漢軍之丁壯及家人廝役  
內創增一千教習鳥鎗西安之滿洲蒙古八旗  
每旗有協領各一員佐領各七員拖沙喇哈番  
等官各七員驍騎校各七員不必創增專管官  
即於其內撥每翼協領各一員佐領各二員拖  
沙喇哈番等官各二員驍騎校各二員附於現  
在火器兵專管教習令滿洲將軍副都統漢軍  
副都統總理之

上從之

己卯都統公蘇努等率八旗將士謝

恩時

上大發帑金厚賞八旗官兵盡償其積負於是將士懼

忤頂感叩懇蘇努等代陳謝

恩蘇努等轉奏曰八旗叅領佐領驍騎校等率軍士

口稱我衆父子兄弟蒙

皇上數十年豢養給之田舍月糧近因小旱又蒙

皇上軫念發倉粟賑濟又

俯憐窮兵增加餉銀用是我衆畜養家口從容閒暇  
得以習學武藝

聖恩高厚有如天地至我等家口漸增衣食用度不敷  
以至稱貸皆我衆人之私也何敢上瀆

聖聽今

皇帝洞見纖微軫念貧苦太賚

帑金盡償積負又均平分給困者皆蘇貧者皆足

如甘霖之霈萬物皆生我衆蒙

皇帝山海洪恩願加勉勵効力戎行乞代衆恭謝

天恩臣等伏覩敷天胥慶薄海同歡兵士無憂彌增

壯志

禁旅強而本根永固四海靖而率土安寧皆

皇上聖德仁恩溥被之所致也臣等幸際

隆時得逢

大賚仁恩周於



禁近忤舞遍於九衢大小臣工歡呼

階陛内外文武歌頌

聖仁

臣

等無任感激代達輿情謹具奏以

聞即率八旗將士在

午門前謝

恩

臣

謹按國家之設兵豢畜之於平日而驅策

之於一時安其身則心可得而用也安其心

則力可得而用也我

朝承平日久士飽馬騰人思自効近者狡寇犯順

皇上聲罪致討八旗擐甲執戈之士莫不踴躍爭先以

不與戎行為耻誰復以室家為念者而

皇上猶曲加軫恤大施浩蕩之仁發帑金數百萬償其

私貸恩何渥也夫無事有坐食之安而徵發

邀破格之賞宜其感激思奮期於滅此而後

朝食矣用兵之道有未見敵而先勝者其此

之謂歟

三月丁酉

諭詳視寧夏黃河船運事宜將軍郎坦等奏言

臣等

自京起行時曾經奏請駐軍大同養馬俟青草  
出邊環歸化城駐防探噶爾丹聲息今反復詳  
視地圖黃河之流自蘭州城東北而行過寧夏  
出邊近瀚海又折而南行入邊今收衆喀爾喀  
內向噶爾丹不知率兵來襲一無所遇無從擄

掠則其返也人馬困乏勢必沿河套之外西趨  
賀蘭山金塔寺而去大軍自歸化城往追亦一  
時難及應於黃河北套灣之地或黃河交界喀  
喇穆冷河地令大兵駐備南有黃河北有瀚海  
勢與關隘等既可以俯護墨爾根濟農等之衆  
喀爾喀而敵人亦不得踰越矣至噶爾丹或不  
當黃河北灣而行自克魯倫土喇前繞杭愛阿  
爾泰山趨嘉峪關來其時有用大兵之處則前

踰寧夏往甘肅之地亦可相援也如駐黃河套  
內要地而猶不獲噶爾丹實信則大兵駐久需  
餉為急請將蘭州北所備浮橋之船及寧夏所  
有渡船酌量修葺裝載大軍糧餉順流而下於  
事有裨奏至

命議政諸臣集議議曰大兵如駐黃河交界喀喇穆  
冷等處則距蘭州既遠而寧夏皆係小船裝載  
糧餉數不能敷致之亦甚難且近以西安滿兵

陝督及寧夏延綏兩鎮兵令將軍總督總兵官  
親率之往備寧夏又令墨爾根濟農巴圖爾額  
爾克濟農等入內遊牧設立哨汛則將軍郎坦  
等所奏無庸置議仍令於草青時率兵出邊環  
歸化城駐防以時偵探如有可乘之機別令奏  
聞奏入

上令郎坦乘此閒暇於偕行大臣官員中擇賢能者自  
寧夏以內至於黃河閱視可否以船運糧來奏餘

如議尋郎坦遣署前鋒統領副都統碩鼐等閱視  
還言自寧夏以內泛舟由黃河而下無有阻礙  
據以奏

聞

戊戌山西大同總兵官王弼請率兵從大軍進  
剿王弼奏言臣備兵二千以待調遣前兵部檄

臣操練放礮每礮用礮手三名礮四十門應共  
選礮手一百二十名臣與各旗員選擇操練俱

已習熟現皆可用

臣

入遵檄撥舉鹿角兵每架

四名至解礮及火藥等物出邊俱當以兵護送  
邊外所用車馬為要營將向無管車馬之職理  
合奏請伏乞

俯念微

臣

愚忠出邊之時准

臣

即率

臣

標下官兵同

大兵而行則可以少効犬馬之力奏至

上從之

庚子



命詳定會閱事宜理藩院奏言

臣

等與內大臣阿爾

迪等議應於上都河額爾屯河兩間七溪之地

會閱俟

車駕到彼戒期之後遣人調集左翼喀爾喀部落諸王前至上都土爾根伊扎爾交界之地右翼喀爾喀部落諸王前至上都黑棚交界之地以待奏至得

旨命大學士與兵部大臣集議議曰喀爾喀等在兩處

會集遣大臣分道先往先往大臣伏候

欽定其理藩院以會閱應議事宜分遣先往大臣各  
令所在地方蒙古駐於會閱七溪百里以外議  
事

駕至之前檄令前來至從閱官兵若隨

駕往覺其繁雜僅以前鋒全隊每佐領護軍二名隨  
駕外其每佐領護軍三名驍騎三名及火器營兵俱  
出獨石口擬於

駕至七溪之時來會至大閱應備器物理當先發俱  
令各該部院奏請前遣其喀爾喀等已傳諭於  
四月十五日來會於期約之地問之度地內大  
臣等俱言四月十五日前後青草可得欽天監  
擇日亦擬四月十二日起行吉  
駕發日期并請於

命下之日諭衆知之奏入得

旨四月十二日啟行前行大臣如何差遣喀爾喀等

如何分別何地安插喀爾喀作何坐次又前有噶爾丹之警備發之兵頗多今噶爾丹遠去其兵應減爾等會同滿洲九卿詹事科道定議議喀爾喀遇亂離散先後來降

皇上不忍坐視伊等滅亡安插邊汛內外賑給米穀牲畜各令得所又念喀爾喀離散之國若無法度撿束益至散亡已將車臣汗人等編列旗隊矣喀爾喀瞻仰

皇上請降者有之請附者有之願入効力者有之前俱  
准其會閱集議在案今出臨會閱應一併酌定  
前遣兩路議事大臣伏候

簡用如安插伊等於內地則土喇俄儂克魯倫等地  
空虛如即遣屯於此等之地則厄魯特事尚未  
定俟會閱既畢指授喀爾喀人等現在遊牧所  
在後再遣大臣官員查核人丁數目令此去大  
臣視喀倫四周暫令遊牧厄魯特事定後仍遣

往土喇俄儂等處安插至喀爾喀人等零星散失或有未經親來報部未曾投入者亦未可定倘後有接踵來投者該部請

旨裁奪今噶爾丹遠去此一會閱也應將前所發八旗兵減去率每佐領護軍四名前鋒全隊漢軍火器營兵而往其每佐領護軍一名驍騎三名俱不必帶往滿洲火器營護軍正當操練亦不必帶往帶往之兵上三旗則隨

駕而行下五旗則出獨石口往赴

御營除三旗都統護軍統領前鋒統領副都統隨

駕外下五旗都統護軍統領副都統亦同兵士齊出  
獨石口至張家口所備兵應俟

駕發之後令將軍瓦代等率滿洲官兵漢軍火器營  
官兵支兩月糧馬馱輕礮出張家口往正白鑲  
白察哈爾遊牧之地隨其水草在彼遊牧綠旗  
操練大礮鹿角及綠旗兵不必帶往會閱之地

全軍建營置哨及蒙古作何屯扎之事令兵部  
理藩院與鄉導大臣官員同議具奏會閱既畢  
將軍瓦代等之兵如何措置該部請

旨至會閱之地應先遣備器物俱令各該部院奏遣  
前行奏入得

旨如議左翼著馬齊布顏圖額爾黑圖西喇吉爾他  
布往右翼著班第索諾和溫達達虎阿爾尼往  
尋兵部理藩院及鄉導大臣議奏



御駕出閱定議喀爾喀案件今將會閱之地全軍布  
營設哨衆扎薩克蒙古喀爾喀屯扎之事酌量

編次

御營內令三旗護軍共為一營居中屯扎其八旗前  
鋒為二營五旗護軍為十營火器營兵為四營  
共十六營環

御營屯扎八旗前鋒為四哨八旗護軍為二十四哨  
繞營酌量遠設汛哨如有不足另行添設往哨

人等令帶廬帳而往兵丁馬匹俱放哨內四十  
九旗諸王台吉及喀爾喀人等目前俱令屯會  
閱之地百里以外

駕到之後令前附

御營五十里屯扎不得入哨內如有會集營中之事  
理藩院官員筆帖式帶來放入四十九旗蒙古  
前來貿易問明旗號名字放入住營外互易其  
哨地於都統副都統內遣每翼二員及每旗護

軍叅領一員不時巡察牧馬之地應遣出官監  
視奏入

上曰汛哨令都統副都統兩兩分班巡察餘如議

辛丑

授林興珠等官秩有差兵部奏兼管火器營都統諾  
邁咨送去年出兵帶往林興珠楊懋烈楊天樞  
等交部議叙應酌量將林興珠楊懋烈以火器  
營拖沙喇哈番用楊天樞以驍騎校用奏入得

旨林興珠從征俄羅斯厄魯特屢著勞績著授三品官餘加議

甲辰總兵官許盛奏請預備解礮車馬許盛奏言所解礮俱到宣府但前裝車解來俱自驛中換馬牽挽若出邊而行遠道必須倍加馬匹更迭牽挽共需馬四百五十二匹作何措辦及礮位火藥砲子等物所需車一百二十輛伏乞勅下該地方官豫備奏至

上諭所需車直隸巡撫簡賢能官量支現存庫銀照數  
堅固製造交該總兵官其所需馬四百五十二匹  
現買則難得肥馬而目下預行備買喂養糜費錢  
糧應於有事之時在該鎮標下兵丁馬內照數取  
用

諭停運米豆

上諭戶部曰目前青草發生之時駐扎大同宣府大兵  
不久出邊應支米豆恐小民不能挽輸至於困苦

令停其運解將現在米豆於出邊之前節省支給

戊申

命總兵官許盛率標兵從大軍前行許盛奏言

臣撥

臣標右營遊擊耿如倫專管大礮左營遊擊吳

良駿專管鹿角二百架以備調遣伏乞准酌

率臣標下官員馬步兵及藤牌手隨大軍前行

効力

上從之

四月壬戌御史沈愷曾奏請暫緩

行邊愷曾奏言執要不煩者聖主之常經趨事不

遑者人臣之大義近聞本月十二日

皇上有巡行邊外之舉

臣

雖愚昧無知仰體

皇上此行無非為蒙古諸臣定賞罰編戶口安插新附  
諸人此誠

皇上如天之仁欲使百萬生靈無一夫不獲之意但邇  
來京師膏雨未足

金史卷九  
卷九  
睿慮焦勞兼之

聖躬遠出間關崎嶇之地為臣子者何以為心且臣聞  
其地未雨先寒未暑先熱與內地迥不相同值  
此夏令初交寒暑不均之候

皇上服食起居亦未必與時順適

乘輿勞頓於外羣臣偃息於家揆之於心有惄然不  
自安者近今已

命部院大臣先行料理止須令其逐一奏



聞於記功錄過之中寓慶賞刑威之意仍與

皇上親臨無異且

皇上宸謀雖遠隔萬里有如指掌豈區區藩服有不在

坐照之內者乎叩乞傳

旨暫緩此行庶

聖躬得以稍節而臣心遂各安矣奏入得

旨喀爾喀向來雖經進貢但伊汗從未嘗輸誠來朝  
而喀爾喀諸汗親率所屬數十萬衆傾心歸附一

切行賞定罰安插撫綏關係甚大所以朕躬親往  
巡狩沈愷曾所奏已悉所司知之

丙寅

命副都統蘇黑等督噶爾丹使人起行先是令蘇黑  
等送噶爾丹使人由歸化城出格德勒古口至  
噶爾丹舊牧之地至是

上諭理藩院曰厄魯特使人應分為三隊發行彼孰當  
先發孰當後發其問明議奏議巴圖爾寨桑阿哈

奈乃噶爾丹之使應第一隊起行滾楚克乃台  
吉之使應第二隊起行達爾漢寨桑愛齊率回  
子而來應第三隊起行令伊等自京城一齊起  
行到歸化城後併合察罕古英寨桑阿卜都喇  
額爾克寨桑等分為三隊即令前所派副都統  
蘇黑員外郎二郎保等帶往督視遣行至應否  
仍令蘇黑二郎保送此使至噶爾丹所在伏候  
上裁奏入得

上令蘇黑二郎保帶伊等至歸化城督視第一隊人  
起行查明伊等人數及駝馬牛羊糗糧器用數目  
送部具奏其兩隊暫止勿遣俟朕還日再奏遣發  
不必令蘇黑二郎保送此使至噶爾丹所在俟後  
兩隊起行之後方令伊等回京

丁卯

車駕發京師安輯來降喀爾喀

甲申

命尚書馬齊等詳定賞喀爾喀次第

上諭馬齊等曰爾等其將喀爾喀詳定次第分別條列  
行文部院馬齊等遵

旨分別喀爾喀汗濟農台吉次序請以折卜尊丹巴  
庫圖克圖土謝圖汗扎薩克圖汗之弟策旺扎  
卜車臣汗為第一等扎薩克墨爾根濟農顧祿  
什希等六人為第二等扎薩克額爾德尼濟農  
布達扎卜等八人為第三等扎薩克台吉車木

楚克納木扎爾等十四人為第四等土謝圖汗  
親弟台吉羅卜臧多爾濟等三十四人為第五  
等扎薩克台吉西地西里之孫垂旺多爾濟等  
七十五人為第六等扎薩克台吉色校阿海族  
中台吉杜默等四百一十人為第七等土謝圖  
汗之衛寨桑顧什等十七人為第八等折卜尊  
丹巴庫圖克圖土謝圖汗扎薩克圖汗之弟策  
旺扎卜車臣汗新舊扎薩克之隨從寨桑護衛

寮屬等為第九等咨理藩院奏

覽得

旨此叙賞事宜令內大臣明珠內務府總管費揚古  
戶部侍郎阿山禮部侍郎席爾達會同頒賞內台  
吉車卜登曾從我大軍効力令於此叙賞中照會  
閣大臣一體條上賞時舉出吉車卜登奏聞

聖祖仁皇帝親征平定朔漠方略卷九